

奏疏存藁卷之二

目次

恢復畧陽縣城克捷疏

恭報僞鎮官兵歸誠疏

請敘投誠以廣招徠疏

恢復陽平關報捷疏

條陳收川方畧疏

恭謝扁額手卷疏

備陳調遣官兵情形疏



題報得獲賊糧接濟軍需疏

題請投誠官兵俸餉疏

報明畧陽起行日期疏

題報會師入川進勦疏

密陳悖旨并報分兵進勦疏

恭報入川進勦日期疏

白水壩浮水過江敗賊報捷疏

青川石峽溝大敗逆賊報捷疏

克取成都報捷疏

題請安插投誠官兵疏

恭謝將軍勅印疏

續報招撫僞鎮官兵疏

續報招撫并請土司號紙印信疏

請設蜀省經制官兵疏

遣員招撫逆渠疏

題報恢川清出賊遺糧餉疏

招撫建昌敘州馬湖文武疏

奏疏存彙卷之二

恢復畧陽縣城克捷疏

題爲官兵大敗逆賊直抵畧陽恢復縣城恭報克捷情形事竊臣督兵破險渡江追賊前進業經題報在案查自十月二十五日夜渡江二十六日黎明追賊抵八堵山入箐臣見地勢險要將官兵分爲三敵仍嚴諭整肅前進步步防備逆賊果於八堵山大梁一帶排列陣勢以待臣慮山高陡險逆賊全憑火器隨傳令後哨官兵於兩

山及溝箐攀樹而上逆賊雖大砲齊發官兵以
綿簾遮當直攻近前賊恃檔木爲牆堅守不退
我兵用火礮噴筒方始克敵賊遂大敗陣斬滾
崖不計其數生擒及倒戈投降者三百餘名得
獲盛甲馬匹鳥機副刀等項甚多餘孽滾崖而
逃隨據陣擒逆兵供稱杜將軍敗回原不敢迎
戰因吳將軍發來譚五將軍下交鎗手一十前
來於八堵山接應廝殺又聽得說從九股三川
發兵要抄大兵之後等語臣以勝兵直下不暇

他顧遂於二十七日戌時抵畧陽見城內大火
燭天隨據投誠僞副叅李作相等迎臣馬前供
稱吳將軍同張譚二將軍都在城外山上扎營
聽得大兵已過八堵山殺敗接應之兵各自拔
營逃奔等情臣卽發遊擊呂自魁李尚翠守備
龔玉柱隨征叅將周世通等帶兵追勦仍令官
兵入城救火於二十八日出示撫安百姓遍招
四山落草僞兵查原任畧陽僞知縣李扈官兵
未到能假催糧之便渡江繳印繳劄投誠順義

可嘉臣以地方新復急須能員料理遂委署知縣撫安百姓至接到僞總兵副叅遊都守千把等官約計百員僞兵二千餘名并得獲馬匹盔甲器械印劄等項以及生擒僞官僞兵傷亡官兵跌死馬匹有功官兵均俟臣查明另疏題報臣謹將恢復克捷情形先爲
題報伏乞

皇上睿鑒施行康熙十八年十一月十三日奉
旨覽卿奏率領官兵追勦逆賊直抵八堵山斬殺甚

多賊寇敗遁恢復畧陽縣城得獲馬匹器械印劄等項具見調度有方將士奮勇深爲可嘉在事有功人員着議敘具奏兵部知道

恭報僞鎮官兵歸誠疏

題爲恭報僞弁率領全鎮官兵投誠順義可嘉微
臣仰遵

勅諭照銜給牌招撫謹具疏

題明伏懇從優敘錄以廣招徠以利收川實効事
竊臣督兵大敗逆賊於十月二十七日抵畧陽
恢復縣城卽遣官兵追賊并遍示招撫情形業
經

題報在案十一月初一日據臣原差招撫千總王

國興隨征都司江澤長領到逆賊王屏藩下僞中鎮改戎旗左鎮總兵官王進才差人并接到僞官兵冊一本稟一件傾心投誠臣卽遵照勅諭賡黃宣布我

皇上寬仁回札卽令前來去後於初三日該總兵到畧陽隨帶左右二營領兵僞遊擊二員僞守備三員僞千總三員僞所千總一員僞隨征都守千把通判知縣等官二十三員馬步兵丁一千二百三十五名繳到僞鎮銅關防一顆僞中軍

遊擊銅關防一顆僞所官銅方印一顆僞劄四十八張到臣該臣看得叛賊變亂之後凡貪名圖利亡命之輩希僥倖於一時者有之被脅煽惑雖悔而不能自由者有之如僞總兵王進才者前據投誠僞副將屈大伸僞守備馬一心皆言久有向化之心爲賊衆防範甚嚴而徽州士民咸稱爲人忠實不縱兵擾民及臣面見材質雄壯談吐老成且備陳川蜀虛實大有可用臣叩懇

聖明勅部從優議敘以廣招徠以收實効所有繳到
偽印三顆偽劄四十八張送部外至于該總兵
所帶之兵與臣陸續招到之兵約計三千餘名
欲全留在營苦畧陽無糧欲盡令解散深為可
惜臣遂挑選堪以克戰者留營應解散者盡皆
給照令其回籍為民其陸續招撫接到偽總兵
副叅遊都守千把以及知府知縣雜職等官均
俟招撫完日移送大將軍總為彙

題合併聲明伏乞

皇上睿鑒勅部議覆施行康熙十八年十二月初二

日奉

旨議政王貝勒大臣會議具奏

請敘投誠以廣招徠疏

題爲恭報投誠文武官員仰懇從優議敘以廣

皇仁以信招徠事竊臣仰仗

天威克復徽州畧陽已經

題報在案所有投誠官員臣遵奉

勅諭宣布

皇仁遍示招撫凡有翻然悔悟爭先來歸者許以原
官仍按功敘錄查逆賊僞將軍吳之茂下領兵
副將屈大伸帶子僞遊擊屈匡并僞守備千把

王星等六員兵三百名於十月十四日首先投誠繳到偽劄一十二張徽州偽知州蔡廓於十五日率領偽州判張贊偽吏目張起鳳投誠繳到偽銅印一顆偽劄三張鳳縣偽城守副將管叅將事郝俊龍帶兵八十名於二十一日前來投誠繳到偽銅關防一顆偽劄四張畧陽營偽守備馬一心帶兵二十三名於二十二日軍前投誠繳到偽劄一張畧陽縣偽知縣李扈於二十三日前來投誠繳到偽銅印一顆偽劄二張

偽牌三張各等情到臣該臣看得偽知州蔡廓偽州判張贊偽吏目張起鳳偽副將郝俊龍不隨賊去傾心投誠理當遵照

勅諭題敘嘉其效順至於偽副將屈大伸久有向化之心礙於牽制今帶兵來歸實爲首先倡義而偽知縣李扈官兵尚未到畧陽假以催糧之使捐棄妻子過江迎臣投誠暨偽守備馬一心與我兵對岸拒敵乘夜帶兵來歸均宜優加恩賚以獎其誠臣叩懇

聖明勅部不必拘其常例在外量給劄付卽准從優
敘錄給以原銜部劄以信招徠如此則從逆官
員仰望

皇恩靡不奔馳恐後矣緣係文武傾心首先歸誠事
理本應咨呈大將軍彙

題但大將軍隔遠而臣急在平定地方鼓勵人心
合并敘明其陸續招撫到僞遊擊都司守備千
把知縣教官五十七員并僞兵二千三百餘名
多係徽秦土著之人俱經查明應留營者留營

應解散者當卽剃髮令其回籍爲民再前後生
擒僞官逆兵二百六十七名臣亦皆仰體

皇上好生之德俱令剃髮存營以示招徠所有繳到
僞劄牌票八十八張統俟平定漢興之日總報
大將軍彙

題聽候部議至臣捐資賞過袍褂靴帽鞍馬銀牌
等項另爲

題報今將繳到僞印三顆僞劄一十二張僞牌三
張具文送部外相應具

題伏乞

皇上睿鑒勅部議覆施行康熙十八年十二月初五

日奉

旨該部議奏

恢復陽平關報捷疏

題爲恭報續遣官兵分路追勦恢復過地方并敘
明前後敗賊情形事竊臣大敗逆賊恢復畧陽
暨分遣官兵追勦情形已經

題報在案臣思沔縣陽平寧羗爲川蜀水陸咽喉
而畧陽四面皆山敗散逆賊潛伏自多尤宜速
靖根株臣隨於續到官兵內挑選稍堪前行馬
匹兵丁令遊擊吳志王洪仁隨征遊都馬成虎
許洪德等統領于三路繼發接應前發官兵并

偵探漢中逆賊情形以及棧道官兵遠近再分遣步兵于四山搜勦去後于十一月初二日據遊擊呂自魁等塘報卑職等二十八日離縣追勦八十里無賊二十九日前進間忽聽東山砲聲據橫塘探馬報稱東山有賊卑職等隨撤兵入山追勦果見步賊約有二千率多拐子交鎗倚山恃林扎站抵敵官兵卑職等見山勢陡險馬匹不能直前遂督率官兵并馬分路攻殺逆賊大敗當陣斬殺及滾崖跌死二三百名生擒

三十餘名餘賊鑽林滾崖而逃因天晚收兵據生擒逆賊供稱我們俱是四川人係譚將軍下兵發來畧陽應援的原是三千十五日漢中起身十八日到畧陽二十二日發我們一千去八堵山一千從九股三川小路上出去許家壩過河要在徽州來的路上抄大兵之後邀截斷糧二十六日到河上聞得說大兵二十五日從乾溝過江我們遂不敢前去奔回半路上又遇着八堵山敗遁的兵合夥大家不敢往畧陽去亦

不敢上大路走要從山裏逃回入川等語卑職等因山大林深且馬匹難行仍撤兵由大路前行三十日於沮水地方離沔縣四十里與棧道一路前探官兵相抵有下馬關叅將郝善隨征副將徐大仁云稱奮威將軍於十月二十七日到漢中進城他們二十八日起身到沔縣查漢中府到沔縣一百里平路畧陽到沔縣一百八十里山路一併報明卑職等今暫扎營於沮水候示等情初三日又據前遣遊擊李尚翠等塘

報卑職等自接官亭分路除沿途追勦零賊不計於三十日抵陽平關逆賊正在過江望見我兵分頭迎敵卑職等奮勇直入殺敗逆賊擁過江去當陣斬殺及水滄約計千餘生擒八十餘名卑職等隨督兵過江追殺二十里天晚收兵往前係四川龍安地方據生擒逆兵供稱吳之茂於二十九日蚤已過江往白水壩奔龍安去了此係後隊并八堵山敗回之兵張譚二將軍未從此路來等語其生擒逆賊得獲馬匹盛甲

器械并陣亡帶傷兵丁卑職等查明另爲具報等情臣隨飭令遊擊呂自魁等統兵亦赴陽平關協同遊擊李尚翠吳志等把守關口偵探逆賊安撫百姓又初四初五等日節據搜勦官兵所報斬殺逆賊招撫到僞官僞兵總敘不開外該臣看得逆賊屢敗勢如破竹者究以財盡力窮兵民離怨我

皇上命師征討救民水火正其時也今漢南旣復陽平畧陽又爲川蜀水陸咽喉而敗遁餘孽不過

釜底遊魂旦夕可滅太平之兆於此可見總皆我

皇上洪福齊天念切生民之所致耳至臣自十月初九日攻克密樹關破險殺賊恢城前後各案生擒逆賊五百餘名陣斬水滄滾崖六千餘名得獲馬騾七百餘匹頭鐵盔一千餘頂鐵甲三百餘副皮盔八百餘頂綿甲馬綿一千四百餘件交鎗鳥鎗八百餘桿長鎗副刀撒袋弓刀二千餘件鳥機三十餘桿大砲六位火藥四千餘斤

招撫到僞官除總兵王進才等副將屈大伸等
另疏題

請外未經

題報總兵副將叅遊都守千把潘九蘭海自文趙
邦祿趙芳李作相丁麒郭永泰魏驊等僞知府
同知通判知縣雜職田大有鄭文元張研芳尹
先聲周文郁等三百餘員僞兵五千餘名并各
案破險恢城殺賊有功官兵及傷亡官兵滾崖
跌死馬匹臣均行令各將弁備查明確造冊詳

細呈報去後俟呈報到日容臣核明另爲繕疏
題

請臣今分兵駐劄畧陽陽平兩處聽候大將軍示下
先將分遣官兵追勦恢復陽平關地方緣由暨
前後敗賊克復情形合再一併

題明伏乞

皇上睿鑒施行康熙十八年十一月二十四日奉
旨覽卿奏遣發官兵屢次擊敗逆賊擒斬甚多得獲
馬匹器械等項恢復陽平關招撫到僞官兵丁人

等具見籌畫周詳調度有方將士奮勇深爲可嘉
在事有功人員着議敘具奏兵部知道

條陳收川方畧疏

密題爲欽奉

勅諭事康熙十八年十一月二十一日內閣學士兼
禮部侍郎臣希福等同臣子廕生趙弘燦到畧
陽齋捧

欽頒勅諭一道臣郊迎至署開讀并學士臣等口傳
密旨臣一一跪聽謝

恩訖我

皇上不以臣爲不才而臣敢不竭盡愚忠仰答

聖明戡亂救民之至意耶今漢南旣復四川急宜進
勦機會正不可失查陝西綠旗經制官兵八萬
四路進征現在軍前暨各口接應約畧四萬五
六千名應於此四萬五六千名中挑選四萬分
爲兩路進取四川一路由廣元取保寧下重慶
收川東一路由陽平取龍安下成都收川西其
間小徑抄道出奇制勝又在統帥者臨時酌宜
而進勦之兵自不爲單在汎之兵或亦可守滿
洲

禁旅國家根本自逆賊叛亂以來南征西討可謂久
苦於外理宜休養今收川多用步卒地勢相宜
况其馬匹數多需用糧草過倍於漢兵若駐劄
漢中興安沔縣接應兩路彈壓地方深爲兩便
至於進川漢兵行糧須當實切預備不可緩視
臣請

皇上勅令督撫嚴飭司道將西安撫臣所屬州縣糧
草供給進勦川東一路官兵將鞏昌撫臣所屬
州縣糧草供給川西一路官兵且兵行糧隨勢

不可缺轉輸糧草全藉民力自古至今不易之
理如前進取漢南令兵自行裹帶一月之糧甚
非善計卽如漢兵一馬豈能馱載三斗口糧披
甲馳驅而步兵背負三斗又可登山涉水遇賊
對敵者乎今不免仍復運送前來在民未減運
糧之苦在兵已抱裹糧之怨况連年三邊換班
之兵調鳳翔調寶雞調秦州調清水以及西和
禮縣通關沙窩香泉等處會無止息所用糧草
何往而非小民之力與其經年苦累無休何如

一勞永逸譚弘曾受

國恩世爵不小前之反叛料出逼脅聞譚詣之子
原任花馬池副將譚天敘現在西安羈候臣未
見其人未識其面旣係譚弘之姪

皇上開天地好生之仁赦其已往召至京師備問詳
細發

勅諭一道令之柙撫伊叔使其來歸則川東不煩大
兵可傳檄而定卽或愚梗不化留此一人何益
去此一人何損吳之茂巢穴旣在松潘勢窮自

必竊踞然彼地番民土司久爲所苦我

皇上亦發

勅諭一道赦其番族土司擒賊獻首亦未可定是川
西一路又省分兵攻勦矣此臣淺見俟在陝諸
臣回奏

廟謨自有灼見而命師遣將尤出

聖明睿裁再四川處萬山之中地險人愚首要得其
民心禁其搶掠我

皇上屢有

嚴旨臣不當重爲奏

請然尚恐奉行未善紀律未明有失嘉惠元元之意
臣又不得不總總爲慮總之餘孽不難撲滅而
民心一失大費人力我

皇上勅諭密旨令臣殫心詳議具奏臣不揣謏陋亦
惟有矢此血誠急圖滅賊以報

聖明殊遇之隆恩於萬一耳除學士臣希福看明外
緣係備陳進勦機宜貼黃難盡伏乞

皇上睿鑒全覽施行康熙十八年十二月初八日奉

旨議政王貝勒大臣會議具奏

恭謝扁額手卷疏

奏爲

聖眷有加無已微臣自分難安謹具疏恭謝

天恩事康熙十八年十一月二十一日內閣學士兼

禮部侍郎臣希福兵部職方司郎中臣吳黑等

齋到

欽頒勅諭一道暨臣子廕生趙弘燦齋到

御筆扁額手卷并口傳

密旨臣於郊外叩迎入署恭設香案跪聽宣讀祇領

當卽望

闕叩頭謝

恩除

勅諭開載事宜容臣另疏回

奏仰達

天聽外伏念臣一介武人才疎識淺苟

國厚恩畀以邊庭重任雖夙夜冰兢恒慮不逮有
負我

皇上知人之明當此南服未靖而臣以衰朽餘生卽

勉承一路竭蹶駑鈍尤慮心長力短委任罔効
乃蒙我

皇上不遺謫劣破格褒嘉榮逾望外從古帝王隆遇
武臣未有如我

皇上今日之盛者也臣拜瞻
聖翰伏聽

溫綸感痛由中涕零哽咽莫知所以惟有益加砥礪
殫竭愚忠期以此身盡瘁疆場而

隆恩優賜傳之子孫圖報於生生世世耳臣謹奏

謝以

聞康熙十九年正月十五日奉

旨覽卿奏謝知道了該部知道

備陳調遣官兵情形疏

密題爲欽奉

上諭事康熙十八年十二月初五日准建威將軍臣

吳丹咨康熙十八年十二月初五日准兵部密

咨前事內開康熙十八年十一月二十三日奉

上諭陽平關逼近寧羗係入川之路沔縣與漢中相

近觀提督趙良棟恢復徽州直取畧陽陽平關意

欲進定四川亦不可定若進定四川則滿洲大兵

不可不隨繼其後此事關係重大着議政王貝勒

大臣會議具奏欽此欽遵該臣等會議得近經臣等遵奉

上諭會議請

勅將軍王進寶提督趙良棟等將已入漢中等處各鎮官兵作何遣調恢復取保寧平定四川事宜詳加商定知會大將軍公圖海等酌量而行令大將軍公圖海遵

旨統兵一半駐劄鳳翔鎮守陝西全省將護軍統領吳丹授爲將軍統領大兵一半爲將軍王進寶

提督趙良棟等後應接濟糧餉務期不致斷絕與總督哈占等相商而行令提督孫思克止領伊屬兵馬遵

旨駐劄原汛防守地方等因具題奉

旨欽遵行文在案提督趙良棟仰副

皇上擢用親統官兵恢復徽州繼取畧陽今又取陽平關遣兵徑取沔縣觀趙良棟由徽州路直入大殺逆賊平定地方似欲相機進定四川倘若不及與將軍王進寶等相商卽乘機進定四川

則滿洲大兵當尾隨殿後輓運糧餉源源接濟
此事所關最爲重大

上諭允當相應遵行請

勅將軍吳丹總督哈占等速統大兵爲進定四川兵
馬後應運送糧餉源源相繼毋誤軍機可也等
因康熙十八年十一月二十三日題本日奉

旨依議速行欽此爲此合咨貴將軍欽遵施行等因
准此擬合咨商爲此合咨貴提督煩爲查照作
何相機而行的於何日起程希速咨覆前來以

便卽發接濟貴提督後應官兵而行等因到臣
臣查畧陽乃大將軍原派四路所指之地而陽
平又爲川蜀門戶且係大江緊要關口理當急
取至逆賊敗遁尤宜乘時進勦蚤定四川仰副
我

皇上戡亂救民之意故臣於恢復畧陽之後卽分遣
官兵直抵陽平關追殺逆賊過河并發往沔縣
官兵亦檄調俱守陽平關以備入川此臣急欲
恢疆滅賊愚忠業蒙我

皇上聖明蚤已洞鑒矣且欽奉

上諭勅令將軍臣王進寶暨臣將已入漢中等處各鎮官兵作何遣調恢取保寧平定四川事宜詳加商定知會大將軍公圖海等酌量而行臣仰承

天語益當努力如大將軍前題進勦漢南綠旗官兵除接應不計外原進興安一路一萬小川子一路一萬棧道一路一萬二千而臣進入堵山一路五千回路共計三萬七千提臣孫思克遵

旨帶回原汛五千尚該三萬二千無論何標何鎮盡數派出通融分撥令臣兩人統領前進後繼滿洲大兵可以平川如再從此三萬二千中減畧不獨四川一省九府地方遼闊山險人愚抑且緊鄰雲貴不可不防不可不重今准將軍臣王進寶回臣咨覆內云本將軍轄屬官兵因彼時軍機緊急無論衝緩概爲檄調業經酌將衝要地方官兵量行發爲汛防并重傷病弱者亦卽令其各歸原營矣所有標路止有五千有餘并

延綏鎮屬一千四百名又調後應延綏漢中興安官兵二千六百名以資進勦外其貴提督一路官兵應聽貴提督酌裁調遣等語是將軍臣將棧道一路已入漢南官兵發回原汛原營者五千六百名矣又文敘移准大將軍暨總督皆稱不便懸定越議應請貴將軍暨寧提趙裁酌而行却皆不言原進興安一路官兵又秦州副將楊三虎呈稱原帶西寧鎮官兵五千員名內遊擊趙元輔帶兵一千五百名奉提督孫遣發

去階文不知遠近遊擊趙光榮帶兵一千名奉提督孫留防小川子一帶防護糧路又撥兵二百五十名貼防成縣卑職止帶馬兵五百名步兵一千七百五十名今奉總督部院牌行令卑職打造船隻料理糧運等語以此觀之是臣通無可以調遣之兵矣臣欲止帶本屬官兵取路前進而臣五千官兵中又豈無傷亡病弱者不獨兵單不敢輕忽抑恐有辜

上諭欲備陳請

旨而進勦機宜不可再緩臣只得將興安一路官兵
指出再文請調四千并申飭楊三虎速速飛調
官兵聽候挑選入川不得推阻除咨呈大將軍
移文總督暨將軍臣吳丹王進寶請速發去後
俟調撥官兵到日臣卽起行先赴大安驛會齊
遵

旨進取保寧平定四川應如何破險殺賊分取地方
均俟將軍臣吳丹王進寶暨臣確議另爲
題報臣因進取四川事關重大且兩奉

上諭嚴切謹將在外調撥官兵前後情形一併
題明緣係兩奉

上諭調撥官兵事理貼黃難盡伏乞
皇上睿鑒全覽施行康熙十八年十二月二十一日
奉

旨議政王貝勒大臣會議具奏

題報得獲賊糧接濟軍需疏

題爲欽奉

上諭事康熙十八年十一月二十六日奉兵部劄付
前事康熙十八年十一月十四日奉

上諭諭戶兵二部前據大將軍等疏內曾稱王屏藩
等於漢中興安等處率賊數萬堅守抗拒等語以
此觀之必有數年儲備糧餉今我大兵驟入殺敗
賊衆恢復地方糧餉諒多得獲當逆賊已敗彼中
猜疑人心渙散之際破滅賊寇恢復地方尚似不

難惟川路運糧所關最爲緊要於恢復城池村落
遍訪賊積米糧查收節用是爲緊要進川官兵不
誤支給則於國家大事裨益非淺各將軍大臣等
各宜盡心聚糧將漢中等處所獲錢糧節省支用
副朕滅寇安民至意以後所至地方惟以收賊糧
餉爲急務爾二部卽遵諭速行欽此合劄該提督
欽遵施行等因臣隨行臣標中軍叅將胡攀桂
等查報去後據稱自十月初九日攻克密樹關
起至三十日恢復陽平關止凡攻破逆賊營盤

恢復城池有賊放火燒燬者有原無積貯餘糧
者查紅川營盤內得獲麥豆八十七石打火店
廟內得獲小麥一百八十六石畧陽得獲火燒
灰土大麥雜糧一百三十石陽平關遊擊李尚
翠守備龔玉柱續報得獲火米京斗一千一百
二石四起共糧米一千五百零五石因前行糧
米未到有支給進勦官兵者有支給投誠官兵
者至追賊駐劄陽平官兵行糧不及運送前去
全支此項糧米已行遊擊呂自魁李尚翠開報

細數到日另爲呈報等情到臣臣查前在白水江與賊對壘攻戰時因兵糧不接已將打火店小麥按兵給散接濟訖其陽平關糧米亦因行糧料豆不接准其動支所有進勦官兵支過糧米自於各官兵應支行糧米內扣除而投誠官兵臣因見其窮苦除當卽解散者不計外應留於軍前以備入川者每名每日准米一升糊口如此項投誠官兵支過糧米應否

恩准開銷或仍於各官兵俸餉起支之日照數扣除
統聽部議伏乞

皇上睿鑒勅部議覆施行康熙十九年正月二十五日奉

旨將軍趙良棟擊敗賊寇撫定地方將賊各處所有糧米盡行收取支給兵丁星速前進有裨進勦機宜深爲可嘉該部議奏

題請授誠官兵俸餉疏

題爲請明授誠官兵隨師入川懇照例議覆以資
進勦以期克効事竊臣自敗逆賊克復徽州畧
陽陽平以來前後招撫授誠官兵如僞總兵王
進才率領全鎮官兵來歸副將屈大伸叅將郝
俊龍守備馬一心等首先授誠經臣

題疏并繳印劄仰懇

從優敘錄迄今未奉部文今奉

上諭急在進兵臣思入川必須量用授誠官兵不獨

熟悉道路抑且推廣

皇仁以示招徠查王進才爲王屏藩下內標中鎮改
戎旗左鎮其人老成練達素有膽勇備知川中
虛實臣請照漢中興安投誠總兵事例准帶兵
入川以期克効其副叅遊都守郝俊龍賈明經
趙邦祿馬登仕魏驊席宗林李守春等均堪領
兵臣因兵餉浩繁亦不敢過爲請留止選得勇
壯烏鎗手兵丁五百名以備入川亦懇照漢中
興安事例令王進才等如何統領並如何准給

俸餉均俟部議定奪伏乞

皇上睿鑒勅部議覆速爲行臣遵奉施行康熙十九
年正月初四日奉

旨該部議奏

報明畧陽起行日期疏

題爲報明微臣起行日期事竊臣欽奉

上諭酌量遣調入漢官兵暨在外官兵情形并求於
原進興安一路官兵一萬中派撥四千檄調楊
三虎所統官兵到日即便起行先赴大安驛會
齊遵

旨進取保寧平定四川等緣由已經具疏

題明續准撫遠大將軍公臣圖海咨覆內開除移
文總督將伊標并興安鎮標官兵酌量調遣外

今將隨本大將軍靖寇將軍并隨征總兵王好文趙名友三標共挑選一千名候文到卽行遣發前去又准總督臣哈占咨覆內開興安一路原進官兵一萬之內興安鎮屬官兵興安旣復俱留本汛固守新復地方希貴提督徑行興安鎮取調一千員名靖寇將軍標下官兵係隨大將軍標下之官兵本部院不便擅行挑撥本部院標下原帶馬兵四千名火器步兵二千名因運送軍需沿途需用重兵防護且漢興新復地

方解散投誠官兵頗多又須重兵彈壓本部院每慮兵數不敷但進勦關係重大當爲挑選一千名俟貴提督起行之日先文卽令馳赴貴提督軍前跟隨進勦等因到臣臣思進定四川兩奉

上諭何等嚴切理當乘時急取仰慰

聖懷今督臣以運送軍需沿途需用重兵防護漢興新復必須重兵彈壓於已入漢中現在就近六千標兵中止撥一千却令臣遠於興安移調又

必等候階文官兵是以入川進勦逆賊爲緩爲
輕而以防護留守爲急爲重矣時日迫切再難
往返遊擊趙光榮趙元輔守備孫國祥官兵遠
自階文西和催調前來於十五十六等日方始
到畧陽臣卽於十七日起行前赴大安驛會兵
外其所統入川官兵數目臣先到大安驛候各
處官兵到齊見數另爲酌定具

題謹將微臣自畧陽起行日期先爲
題報伏乞

皇上睿鑒施行

題報會師入川進勦疏

密題爲恭報微臣已抵大安會師入川進勦事竊
照進取保寧平定四川兩奉

上諭而臣調集官兵於十二月十七日自畧陽起行
已經具疏

題報在案今於本月二十日抵大安驛二十一日
會同將軍臣王進寶吳丹佛尼勒叅贊臣傑印
副都統臣覺和托面議進勦機宜臣以川路狹
隘且逆賊吳之茂杜學汪文元等現屯扎於白

水壩青川一帶在我肘腋之下自踵昔年故轍於陽平朝天廣元昭化斷我糧路此川西之患不可不防而寧羗通巴州又川東要隘不可不慮故臣前於欽奉

勅諭一疏有從兩路收川之條奏如一路由廣元取保寧下重慶收川東一路由陽平取龍安下成都收川西兩路聽奮威將軍臣王進寶任擇進一路臣進一路不獨使狡賊首尾不能相顧抑且收功迅速而將軍臣等以兩路並進相去太



遠又稱糧運接應不前况聞王屏藩現在金屏山下營應從一路先取保寧白水壩止可撥兵二千於對江扎營俟兵到廣元昭化再議分勅至臣請於原進興安一路官兵一萬中派撥四千屢文移催今到大安驛止有靖寇將軍標兵一千名總督標兵一千名臣只得於臣原進入堵山一路寧屬官兵五千名中盡力挑選四千名又於續調寧屬後應守兵一千中挑選五百名畧陽營挑選四百名陽平營挑選二百名并

甘寧撫標四百名副將楊三虎遊擊趙光榮趙元輔等所統西寧鎮官兵挑選三千五百名共一萬一千名臣統領於十二月二十一日自大安驛同將軍臣王進寶起行前進其一切後應以及接濟糧餉聽建威將軍臣吳丹等分佈外相應具

題伏乞

皇上睿鑒施行康熙十九年正月初五日奉
旨議政王貝勒大臣會議具奏

密陳悖 旨并報分兵進勦疏

題爲密陳悖

旨并報明微臣分兵進勦事竊臣前奉

勅諭條奏平定四川由兩路進兵業經議政王大臣會議奉有

勅下將軍臣王進寶同臣會議具題到日再議之

旨查兵部與將軍臣王進寶咨係由鳳翔棧道漢中御塘撥什庫於十二月二十日午後在大安驛送到之文臣等會議在二十一日乃將軍臣等竟不

奏疏存彙
卷之二
三
將奉

旨部文拏出會議亦不通臣知道而兵部與臣之文
係由秦州西和畧陽

御塘承差於十二月二十三日酉時在寧羗方始送
到臣隨差官將部文送與將軍臣王進寶看并
詢兵部與伊之文在於何日雖將軍臣王進寶
推查不能卽應後改稱二十一日方到然

御塘底簿可查撥什庫可問卽使二十一日文到亦
當通臣知同臣議豈有將奉

旨會議之事竟置不問乃以無容議三字自行題覆
不獨欺臣無臣抑且目無

聖旨更可奇者本後自定取保寧取成都將臣及一
路官兵不言一字臣思朝天廣元賊自不守若
白水壩青川賊退兵下龍安則保寧之賊自無
能爲矣而成都係平坦川面城池不堅從來難
守重慶依山環水譚逆土兵熟習火器水戰白
水壩爲全蜀之頭有大江之險且逆賊現有三
箇將軍十數總兵把守是取川西先難後易取

川東先易後難顯而易見前在大安議話時臣當同將軍臣吳丹等面言川東川西兩路憑將軍臣王進寶揀擇一路臣取一路而將軍臣王進寶不肯分取是不走川西不任川東今題本內云自取保寧自取成都是止擇其易者而爲之矣不識置臣一路官兵當於何地臣若不言則師出無名所向何地况將軍臣吳丹等原議明兩路官兵先鋒營俱在前走臣與將軍臣王進寶一第一日前行臣隨言將軍自是前行提

督在後惟是山大地狹官兵歇頭下營處所必須通融妥便原議大安驛起行將軍臣王進寶先行至列金壩下營次日臣至寬川舖下營又次日將軍臣於寧羗下營又次日臣於黃壩驛下營今將軍臣王進寶俱違前約推以兵丁占歇致臣一路官兵不分晝夜至二十五日尚未到齊查大安至寧羗止九十里五日四夜馬未去鞍人未停脚而官兵咸以人不能住歇馬匹不能喂養爲苦爲怨至寧羗到黃壩驛應臣一

路官兵起行下營之地而將軍臣王進寶又復發兵起行占歇矣臣之官兵只得擁擠守候且本內不言臣一字行走又復違越成約先鋒又不用臣一路官兵臣窺厥乃心全無公念如前遇城池賊守則自候兵到不守則自爲報功在臣之心惟有仰報

聖明照臣前疏必期實踐原無望功之心但所統官兵皆係

朝廷官兵豈盡無功名之念肯甘心尾隨人後徒自

受苦耶更慮將軍臣王進寶報功本到我

皇上豈不問臣所統官兵竟在何處是臣認咎不是不認咎不是將欲住守請

旨不獨軍機不可緩而部文現有若進定四川必分兩路則趙良棟亦給與將軍

勅印臣雖至愚豈不慮自涉欲爲將軍之譏乎但將軍臣王進寶將奉

旨會議事理可以不通臣知可以不同臣議是心可忍孰不可忍如此之事可行何事不可行此臣

甚可寒心者倘不急急分路仍在一處與之爭論不獨貽誤軍機抑恐大負

皇上倚任之重况勢敗之賊所當分頭勦殺一路滿漢三萬多兵實實擁擠不開今臣只得遵奉議政王大臣會覆

上諭觀趙良棟由徽州路大殺逆賊平定地方似欲相機進定四川倘若不及與將軍王進寶等相商卽相機進定四川又諸王會議現今如有進定四川之機卽一面酌行一面奏

聞臣遂於十二月二十六日自寧羗起行分路於陽平關過江勦殺白水壩青川之賊相機平定地方恢復城池外所有微臣分兵前進及前後情形不得不備陳於我

皇上聖明之前也總之臣前以微臣年歲漸老報効日短願竭愚忠仰答

君恩事一疏獲罪於衆迄今羣起而爲難臣一忍再忍因進征爲重封疆爲大今將軍臣王進寶悖旨行私一至於此使臣不得不言不得不避緣係陳

明悖

旨并分兵進勦前後情節貼黃難盡伏乞
皇上睿鑒全覽施行

恭報入川進勦日期疏

密題爲恭報微臣督兵過江入川進勦日期并再
備細陳奏兩路進兵務期萬全仰慰

聖懷事臣查白水壩乃川江上流第一緊要關口與
昭化唇齒相接有白水壩則昭化可守有昭化
則保寧可守是逆賊以重兵屯扎於此者深有
謂也如我兵進取保寧必須昭化過江抄金山
之後如不能過昭化之江直去保寧自是兩持
則白水壩青川之賊踵蹈往昔出陽平寧羗甸

天昭化廣元沿江一帶抄我兵之後斷我兵之糧此十三年大兵於盤龍山乏糧受困之明驗也臣前欽奉

勅諭條奏兩路進兵者正所謂破賊狡謀使其首尾不能相顧出情勢所必然亦前車之證驗卽在大安驛會議將軍臣王進寶欺隱部文臣雖未見奉

旨之行而兩路進兵自屬妥當遂前後譬論言之至再至三且兩路任憑將軍臣王進寶揀擇一路

如願取川東則臣取川西如願取川西則臣取川東此臣公忠之心將軍臣吳丹等可証可問在將軍臣王進寶不走川東不任川西者窺測其心既不舍保寧又不肯下川東欲貪取成都又不肯走陽平過三道大江蓋彼題疏中自言臣取保寧臣取成都已見其大意矣而將軍臣吳丹等亦不欲兩路前進者不過因兵單不便分開惟是兩路官兵一路前進加以滿洲後應之兵三萬有餘且馱馬帳房米糧等項實實擁

奏疏存彙 卷之二
擠難行前進之兵旣不照後後隨之兵勢必夜
行不獨兵疲馬斃有傷根本抑恐狡賊於險隘
抄出卽有後應之兵豈能遍處防護是白水壩
應進一路官兵勢不可少臣前分兵時倉卒繕
疏未及備陳謹再詳細

奏明仰慰

聖懷至臣與官兵此行益加激奮務期破險滅賊蚤
奏蕩平臣於二十七日抵陽平二十八日督兵
過江前發入川進勦倘能仰副我

皇上救民水火之仁則白水壩險關一破昭化之賊
自遁全蜀可指日而定矣貼黃難盡伏乞
皇上睿鑒全覽施行

白水壩浮水過江敗賊報捷疏

題爲官兵仰仗

天威奮不顧身浮水過江攻破險要大敗逆賊全蜀
指日可定謹報明克捷情形仰慰

聖懷事竊臣自寧羗分路抵陽平關督兵過江入川
進勦情形業經兩疏

題明在案臣於康熙十八年十二月二十九日率
兵抵白水壩逆賊隔江對岸下四箇營盤渡口
用石岡木柞木簽架使鎗砲我兵綁皮袋筏子

隔江攻奪渡口一晝夜奈江水洶湧逆賊死守
火砲重密官兵難以用力臣卽傳諭各官兵爾
我激奮前來原爲仰報

朝廷尚不用命更待何時遂不用筏子不拘渡口挑
選臚壯大馬官兵重披馬綿於十九年正月初
一日黎明派定總兵王進才叅遊都守呂自魁
王洪仁趙元輔劉虎李洪許洪德等各帶所部
官兵分三股頭子直擁過江逆賊大砲齊發出
木柞石囤接戰官兵奮不顧身爭先勇在溺水

砲傷者固有而勇敢之氣喊聲震天滿江皆兵
逆賊膽落不能抵敵大敗奔山連破兩箇營盤
陣斬滾崖水滄約計千餘生擒倒戈者三百餘
名得獲盔甲器械旗幟馬匹等項甚多隨據生
擒僞守備郭景儀等暨繼綁到重傷僞都司朱
文玉等供稱領兵係僞汪將軍姜總兵劉總兵
李總兵王總兵徐副將沈副將其青川尚有毛
總兵賀總兵雷總兵下營古城吳之茂下營等
語臣一面催令步兵綁木筏速速渡江勦殺奔

奏疏存彙 卷之二 吳
山逃遁之賊臣督大隊官兵前進追賊因追賊
緊急不及備敘繕疏已將大槩情形塘報兵部
代爲先行啓

奏訖該臣看得白水壩乃川江上流第一緊要關
口與昭化唇齒原係四川後門俗稱鐵門坎故
賊用重兵把守今旣攻克官兵可以直下成都
是破其腹心矣腹心旣破則全蜀指日可定總
皆仰仗我

皇上天威之所致也其有功官兵傷亡官兵及得獲

盛甲馬匹器械等件容臣查明另爲

題報伏乞

皇上睿鑒施行康熙十九年正月十七日奉

旨覽卿奏率兵進勦四川逆賊直抵白水壩浮水過
江攻破逆賊營寨擒斬甚多得獲器械馬匹等項
具見籌畫周詳調度有方將士奮勇深爲可嘉在
事有功人員着議敘具奏兵部知道

青川石峽溝大敗逆賊報捷疏

題爲再報官兵追勦直抵青川大破賊衆陣斬僞
鎮逆渠喪膽并報龍安文武投誠恢復府城克
捷事竊臣前於白水壩督兵過江大敗逆賊追
殺情形已經另疏

題報臣因兵旣深入乘賊敗遁驚散之際難容遲
緩不計程途遠近盡力追趕如白水壩距青川
三百里山路我兵於正月初一日過江勦殺追
賊起曉夜奔馳於初三日午時臣抵青川據前

探官兵報稱逆賊汪文元等自白水壩敗遁至
青川毛賀雷三總兵接應共合兵四千有餘不
敢守城適成都大路奔逃卑職等併力追趕離
青川二十餘里賊於石峽溝伏兵抵敵卑職等
現在攻勦等情傳報前來臣卽嚴督後隊官兵
馳至果見兩山夾溝逆賊恃其險要憑其火器
甚是鴟張我兵俱屯夾溝難以用力卽令官兵
併馬分爲左右上山總兵王進才遊擊黃進忠
馬登仕吳志都守李洪許洪德等領兵由左叅

遊都守呂自魁王洪仁龔玉柱孫洪育李世勳
周士通馬成虎等領兵由右俱令攀崖鑽林而
上直抄賊後令叅遊都守胡攀桂鄭罷趙元輔
李尚翠劉虎孫洪謨等從正路夾攻上下相應
逆賊見我兵登山度不能支卽欲敗走我兵堵
截大殺一陣自未至西殺死約計七八百名生
擒倒戈者五百餘名守備龔玉柱陣斬僞總兵
劉得芳把總李印芳生擒僞副將徐棟逆渠汪
文元隻身滾崖而逃其餘僞鎮各逆陣斬滾崖

跌死尚未分辨除仍嚴督官兵分爲兩路連夜
追勦直下成都不可少緩臣收兵安民繕疏聞
龍安僞總兵姜應熊松威道李成棟錢受祺知
府宋永祚等文武投誠容臣查明印劄另爲具
題有功官兵傷亡官兵及得獲盛甲器械馬匹旗
幟劄付等項查明另報又據劄戈僞守備李復
業供稱劉得芳係汪將軍下中鎮總兵徐棟係
姜總兵下右營副將俱爲經制領兵官今日殺
死者尚有領兵官多等語該臣看得青川一城

乃川西四通首要之區南去成都北通階文東
接保寧西界松潘爲賊聚兵之所亦賊必防之
地而陽平一路官兵於白水壩渡江實出不意
今直搗其腹心用之得力成都自不能守是臣
前疏全蜀可期蕩平之首驗也惟是保寧距成
都八馬站官路不及六百里程途而白水壩距
成都一千一百里山路遠近旣殊合併敘明伏
乞

皇上睿鑒施行康熙十九年正月十七日奉

旨覽卿奏率領官兵追勦逆賊直抵青川大破賊衆
陣斬僞總兵劉得芳等得獲盔甲器械等項恢復
龍安府城具見籌畫周詳調度有方官兵奮勇深
爲可嘉在事有功人員着議敘具奏該部知道

克取成都報捷疏

題爲官兵仰仗

天威屢敗逆賊直下成都克取省會文武投降全城
底定謹恭報大捷情形事竊臣於正月初一日
督兵破白水壩賊險浮水過江初三日大敗青
川之賊并龍安文武投降緣由臣一面繕疏具
題一面催督前探官兵急急尾追直下成都不可
稍緩使賊有備再發二敵官兵接應而龍安僞
總兵姜應熊僞川西道李成棟前任道錢受祺

僞知府宋永祚僞知縣張雲鳳僞叅將伏應登
長官司王鎮土通判王啟睿等文武各官率領
兵民番族人等繳印繳劄投誠除當卽賞給袍
帽鞍馬等項并委副將石福帶兵一千名前去
龍安駐防招撫松潘一帶地方又留遊擊馮德
昌帶兵一千駐防青川臣卽督兵前進隨接據
前鋒總兵王進才叅遊王洪仁呂自魁等塘報
卑職等追賊過青箐山不分晝夜不顧深箐險
隘冰滑逆賊見我兵追急於深箐林木險隘處

所用鎗砲大刀拚命堵當我兵俱是步步努力
攻進此山上下五十里前後陣斬滾崖跌死逆
賊約計千餘生擒二百餘名初四日申時追至
舊州明月江有逆賊復來應援之兵斷橋守江
架使鎗砲卑職等督兵浮水直擁過江大殺一
陣擒斬四百餘名據生擒僞官王見李應龍等
供稱僞將軍吳之茂於十二月二十四日自古
城起身二十八日到江油縣過年總統王將軍
調了他兩次叫去昭化接應初三日聞的說大

兵過了白水壩的江打發李總兵帶我們兵一千來此堵截拆橋等語具報到臣臣以成都爲逆賊根本首要之地若敗賊入城攻圍不易遂傳令總兵王進才叅遊王洪仁趙元輔呂自魁李尚翠吳志柴英李洪劉虎岳天壽等分兵兩路直撲成都臣督後隊官兵兼程前進於初八日至綿竹地方僞勁武將軍汪文元迎臣繳印投降初十日抵漢州拏獲僞監軍同知楊逢志執逆渠王屏藩與僞虎牙左將軍韓天福公文

一角據稱奉差成都公幹王屏藩譚弘俱在保寧設備死守伊於正月初四日離保寧大兵尚在廣元又稱保寧實不知有此一路官兵從白水壩過江前來連小的到漢州尚且不知等語及閱逆渠手札係安慰逃官逃兵之語又據前探官兵王進才王洪仁等報稱卑職等官兵追賊不分晝夜僞將軍吳之茂係在先逃走汪文元追急就降僞總兵王國臣李國華盧景泰雷豐毛正義等俱各大敗四散入山奔逃初九日

追了一夜黎明捨門入城已將四門把守官兵
遵令俱在城上列隊候示有僞將軍韓天福在
前奔逃僞巡撫總兵文武兵民現在剃髮伺候
投降等情到臣臣卽督兵連夜前進十一日蚤
僞四川巡撫張文德僞成都鎮總兵王夢楨王
屏藩下僞前鋒總兵藍兆周僞援勦後鎮總兵
林國勝僞坐鎮總兵費培壯僞漢鳳鎮總兵張
友成僞靖蘆鎮總兵牟漢鼎吳之茂下僞前鎮
總兵郭繼祖僞內標中鎮總兵張象華等僞司

道董定國王律南廷鉉黃起廕等僞副叅遊守
陶國相官進俸等文武大小官二百餘員紳士
商賈兵民數千於二十里鋪迎臣投誠臣遂一
一宣布我

皇上寬仁各宜安心不得驚慌并痛禁兵丁不許搶
掠入城卽爲出示安民查僞將軍一員僞巡撫
一員僞司道府州縣二十二員僞總兵一十八
員僞副叅遊都守千把一百六十三員各標營
僞兵五千餘名臣俱令各該總兵備細造冊容

臣查點明白酌定安插而倉庫錢糧卽委僞按察司董定國署布政司事清查造冊不得欺隱其文武僞官前後投誠緣由繳到僞勅僞印僞劄數目得獲盔甲器械砲火馬匹等項倉庫錢糧撫司冊報容臣查明另疏題

請開報而屢捷殺賊恢城有功官兵沿途追賊遇陣傷亡水溺官兵十三年旗下被難官兵苦獨力寶鷄益門鎮帶傷被執靖寇將軍標下官兵亦俟查明具

題至生擒僞官僞兵臣仰體

皇上好生之德俱令剃髮示以不殺以廣招徠外該臣看得成都一府乃四川省會爲雲南門戶旣爲我取則滇黔震動且素稱沃野千里人民財賦之鄉逆賊失此則無所恃矣官兵不出十日而下雖曰兵貴神速然實由出其不意總皆仰仗我

皇上天威

國家洪福所致惟是官兵不分晝夜追賊緊急如

白水壩至成都一千一百里程途而荒野蠻徑兼之高山深箐大江惡石實有一千五六百里寫遠馬匹沿途損傷丟棄者不計卽已到成都者率皆疲乏已極除遣總兵趙名友遊擊趙光榮守備于成龍帶兵一千前去中江縣潼川州收復地方接應保寧遊擊馬登仕守備葉自昌帶兵五百名前去招撫黎雅通建昌之路又令守備陳英同投誠副將蘇虎遊擊馬忠帶兵五百名前去簡州資陽招撫地方偵探重慶之賊

再遍發告示令旗招撫遠近州縣山林之民并敗賊落草僞兵俟官兵到齊馬匹稍歇再爲分遣相機進勦臣繕疏間復有吳之茂下僞左鎮總兵王國臣前來繳印繳劄投誠臣亦撫諭安插訖相應一併

題明緣係官兵屢敗逆賊恢復四川省會恭報大捷情形貼黃難盡伏乞

皇上睿鑒全覽施行康熙十九年二月初二日奉
旨覽卿奏率領官兵沿途勦殺逆賊星馳前進直抵

成都僞將軍汪文元僞巡撫張文德僞總兵王夢楨等文武官員人等相率投誠恢復省城具見籌畫周詳調度有方首倡入川長驅克捷將士奮勇深爲可嘉在事有功人員着議敘具奏兵部知道

題請安插投誠官兵疏

題爲成都既定松潘招撫投誠文武官員理應請旨安插以奠封疆事竊臣前欽奉

上諭條奏兩路進兵者因十三年大兵於盤龍山之糧受困詢諸投誠官兵咸稱逆賊從青川白水壩出陽平寧羗朝天廣元昭化抄我兵之後斷我兵之糧故也雖彼時進兵諸臣不然兩路而臣破白水壩之險大殺青川之賊直下成都不十日而搗其腹心全川底定豈不爲奇正兼施

兵貴神速之證驗乎

聖明在上自有洞鑒臣何必頻言再

奏惟是將軍汪文元追急投降成都文武不及戰
守俱皆投順官兵搶門入城原與傾心投誠者
不同因雲貴尚在負固人心尚懷疑畏此臣又
不得不叩懇

聖明請開

寬典以廣招徠查臣自恢復龍安克取成都招撫松
潘黎雅邛直隸等州投誠過僞將軍一員僞總

兵二十四員僞副叅遊都守千把三百餘員兵
五千餘名僞巡撫一員僞司道府廳州縣雜職
一百餘員土司一十三處臣思此項官兵必須
安插穩妥庶可無慮臣請照漢中投誠事例每
總兵一員留兵五百名下設遊擊一員守備
員把總二員當選總兵六員挑兵三千名隨臣
征勦爲

國効力其餘兵二千及庸常不堪之官臣給執照
俱令解散爲民其不領兵應隨征者各照僞銜

削去一級換給劄付隨征効力所有僞文職司
道府廳州縣容臣試其才能察其實績堪任者
另疏請

旨不堪任者旗下官員勒令回旗吳逆藩下之人請
旨安插而各省民籍之人無論科目別途聽其自回
原籍以示我

皇上寬仁至僞巡撫張文德正黃旗廕生既係旗下
人又爲僞巡撫不便留川理應候

旨回

京而臣復有請者投降隨征武職官員既不便

一請領兵部劄付大將軍駐劄隔省路復爲遠
臣旣爲一路總統應否准臣就近換給劄付合
併敘明統聽議覆臣未敢擅便伏乞

皇上睿鑒勅議行臣遵奉施行康熙十九年二月十
六日奉

旨議政王貝勒大臣會議具奏

恭謝將軍 勅印疏

奏爲

聖明恩遇過隆臣心愈切難安時以勦逆方殷謹仰
承

寵命恭謝

天恩事康熙十九年正月二十五日准兵部咨文從
御塘

頒發到微臣坐名

勅書一道勇畧將軍銀印一顆臣率行間將弁郊迎

奏疏存彙 卷之二
至署恭設香案望

闕叩頭謝

恩訖念臣邊鄙散才庸碌無長謬任巖疆每懷不逮
卽前此請定漢南今議兩路平蜀實皆由我

皇上念切民生

廟謨正合

天意臣不過竭其心力少盡職分何敢當

勅諭褒嘉

恩綸優渥疊加無已耶理宜引分奏辭祇以時當用

兵正臣下竭忠奮力之會又不得不仰承

寵命益加黽勉除臣祇遵開印任事外謹恭

謝以

聞康熙十九年二月二十日奉

旨覽卿奏謝知道了該部知道

續報招撫偽鎮官兵疏

題爲微臣遣發官兵陸續招撫到偽鎮偽兵解散
餘孽仰慰

聖懷以靖地方事臣查續經招撫到毛正義係吳之
茂下僞前鎮總兵官李應魁係吳之茂下僞後
鎮總兵官雷豐係杜學下中鎮副總兵王之翰
王之後係汪文元下僞中右二鎮副總兵再副
叅沈道通白俊楊福才等暨前陣斬之總兵劉
得芳生擒之副將徐棟投降之總兵王國臣妾

應熊將軍汪文元等皆係前於密樹關徽州白水江八堵山畧陽白水壩青川舊州等處與臣一路官兵屢次對敵守險抗拒領兵之僞官也逆賊自青川大敗後臣思成都爲腹心若不急急追殺使其入城拒守不獨攻圍不易而臣一路官兵似覺深入於是嚴督官兵不許馱帶鑼鍋帳房止拏隨身乾糧烘炒不分晝夜尾隨追殺逆渠有追急投降者有逃遁入山者復慮此輩潛伏山林蔓延爲禍根株不靖終貽後慮遂

遣發官兵多方招撫方始陸續投降前來臣一
一仰體

皇仁發給照牌安插訖又段登仕係王屏藩下僞右鎮總兵官胡振雄係張起鳳下僞中鎮總兵官劉振傑係張起鳳下僞右鎮總兵官并副叅蘇虎畢成英龍見翼朱相姚應方馬希旺潘騰鰲任定國李先柱楊玉等各帶兵不等繳有印劄投誠前來查皆係保寧昭化不戰自回顧家之官兵臣亦一一安插訖二項官兵雖非首先効

順亦當槩請

寬仁應否照臣前疏奏

請各照偽銜削去一級換給劄付隨征効力以廣招

徠伏候

睿裁至於兵丁亦止選其堪以入伍者留營其不堪

充兵者隨即給照解散爲民所有繳到偽印劄

付另疏彙繳外相應具

題伏乞

皇上睿鑒勅議行臣遵奉施行康熙十九年三月初

二日奉

旨該部議奏

續報招撫并請土司號紙印信疏

題爲恭報微臣遣發官兵陸續招撫過各路地方
文武官員并土司番族人等仰慰

聖懷以奠巖疆事竊照微臣一路官兵十日之內
取成都文武投降全城底定緣由已經具

題在案而松潘威茂黎雅建昌敘府永寧等處臣
復兩經遣發官兵去後查松潘僞署總兵謝掄
暨標下中左右三營僞遊擊王忠韓可世李士
麒漳臘僞遊擊史鳳平番僞遊擊段成功樊溪

偽遊擊熊夢芳小河偽遊擊馬守印威茂偽叅
將王成庫黎雅偽遊擊白玉顏松潘衛掌印偽
守備徐永翼大渡河守禦所偽千總姚文蔚茶
馬偽通判馬俊德威州偽知州劉星臨茂州偽
知州張懋德石泉偽知縣熊士章安縣偽知縣
馬希上漢州偽知州杜同春綿竹偽知縣蘇龍
門彭山偽知縣朱偉新繁偽知縣彭如珍金堂
偽知縣王鏞新綿州偽知州何淪崇寧偽知縣
楊兆昕什邡偽知縣蔣玉侯彭縣偽知縣張廷

翰灌縣偽知縣張以成郫縣偽知縣王鳴瑞崇
慶州偽知州尚希堯德陽偽知縣黃彪彰明偽
知縣潘驤簡州偽知州裴繼遠井研偽知縣洪
瀨資陽偽知縣王肅內江偽知縣田鳴鳳仁壽
偽知縣涂應詔溫江偽知縣宋應鴻新都偽知
縣李湜資縣偽知縣尹嗣陟邛州偽知州游恪
大邑偽知縣張蘊保縣偽知縣潘國忠汶川偽
知縣張五典洪雅偽知縣何瓊眉州偽知州羅
天柱蒲江偽知縣蔡乾夾江偽知縣史紫宸中

江僞知縣趙景清丹稜僞知縣陳景藩威遠僞知縣毛雲昇榮縣僞知縣蘇景湯雅州僞知州常念茲名山僞知縣周維新榮經僞知縣羅安蘆山僞知縣張學堯等又黎雅天全六番招討司高一柱烏思藏大國師野什着麻靜州長官司董應詔隴木長官司何延禧岳希長官司坤倫長寧安撫司蘇天榮水草坪土巡檢蘇廷賓松溪長官司孫萬受牟托土巡檢溫尚卿寒水土巡檢高元鼎瓦寺安撫司坦朋吉卜雜谷安

撫司桑吉朋永平長官司李聯桂壩底長官司唐國柱等各率所部官兵漢土番民前來成都繳印繳劄投誠臣俱一一頒賞換給執照委牌訖又僞親軍昭勇將軍劉之衛下中鎮僞總兵李芳述前鎮僞總兵鄒九疇右鎮僞總兵蔣榮德僞坐營副將陳元敘馬營僞副將蕭琛各率所屬遊都守千把差人自敘府前來投誠又僞川南道郭友龍率敘州僞知府夏允中僞通判蘭薰宜賓僞知縣王朝聘督糧僞同知王基等

亦差人前來接誠臣俱頒賞給示令其速行前來外查自破白水壩青川恢復龍安克取成都以來招撫過僞將軍汪文元僞巡撫張文德僞總兵姜應熊王夢楨張友成藍兆周郭繼祖費培壯王國臣毛正義李應魁胡振雄劉振傑段登仕葉桐張象華林國勝牟漢鼎李執中梁凝禔蕭應舉馬進玉王美楊應麟劉光臣陳元孫攀孝劉耀潘彭鄭萬梁履泰王勝等僞副總兵雷豐王之翰王之俊陳賢等僞副將叅遊沈道

通蘇虎費重振仲玉位蕭秉隆買陞泗陳守福陶國相官進俸楊嘉珍等僞司道董定國李成棟王律南廷鉉黃起蔭張元凱等僞府廳王鼎宋永祚魏哲王任弼等以及州縣土司等官共六百八十二員共繳到僞勅三道僞金方印一顆僞銀方印一顆僞銅印關防條記一百三十四顆僞劄六百八十二張理應差官填給火牌另爲齎繳相應

題明至各路土司不比僞授文武官員必俟接誠

後繳到印劄方始具

題請

旨授銜臣請將川省各路土司應得

勅書號紙印信

勅下該部查照

典例速爲頒發行臣就近一面招撫一面卽行頒給

使遠人蚤覩

聖朝舊制踴躍歡呼則滇黔諸司無不望風響應恐

後矣伏乞

皇上睿鑒勅議施行康熙十九年二月二十八日奉
旨該部速議具奏

請設蜀省經制官兵疏

題爲川蜀旣經恢復經制官兵理當速爲請設急
備征防以安人心以固巖疆事竊惟四川一省
處萬山之中有大江之險與滇黔秦楚爲鄰得
之最難守之不易自古迄今歷歷可考而成都
省會尤腹心重地卽我

朝前此進兵言取川省者經年累月糜費錢糧不知
凡幾今仰仗我

皇上威靈官兵用命不十日而搗其腹心各處盡皆

披靡可謂得之最易矣然滇黔未下戰守之計不可不急爲籌畫如臣所統陝省遠征之兵自白水壩破險渡江兼程追賊旬日之內跋涉一千五六百里馬匹損傷甚多步兵經此長途亦多疲憊除去留守白水壩青川龍安等處并節次遣發於松茂建昌黎雅瀘州敘府各路勦撫在在需兵分佈不周且省會城垣四十里州縣幅幘三十處更有敗散逆兵潛伏山林尤爲可慮臣欲仰遵

勅諭移文大將軍再調陝省兵三五千前來分防不獨不能應手亦恐跋涉至此驟難爲用臣之淺見不若急復經制以川省用川兵之爲愈也查松潘乃極西重地建昌永寧逼近滇黔我朝舊制松潘建昌永寧原設三鎮後以永寧爲腹裏裁鎮改協今當請照舊制仍復三鎮速爲設官立兵以資彈壓所有應設經制武職大小官弁容臣另疏具

題其經制兵丁臣請將前疏

題留隨征投誠官兵及今陸續招撫到未經具
題官兵分發三鎮入爲經制數目不足者卽於本
地嚴查將逃回落草原日兵丁補足甚爲兩便
惟是新設官兵急需俸餉臣叩懇我

皇上勅諭速爲撥發星夜前來蚤爲安插庶地方人
心自定而新復巖疆得收現成之兵征防大有
裨益矣緣係請設經制官兵急備征防事理貼
黃難盡伏乞

皇上睿鑒全覽

勅議行臣遵奉施行康熙十九年三月初五日奉
旨該部議奏

遣員招撫逆渠疏

題爲欽奉

勅諭事康熙十九年正月二十五日准陝西撫臣杭
愛咨准兵部咨開照得內閣發出招撫譚弘

勅諭一道松潘土司番民人等

勅諭一道應交驛站齎送陝西巡撫杭愛處并譚天
敘送赴將軍管寧夏提督事務趙良棟軍前令
其往撫譚弘松潘土司番民人等

勅諭一道送赴將軍王進寶軍前俱聽伊等酌量設

法發與番民土司可也等因到院准此所有譚天敘并

勅諭相應咨送爲此合咨貴將軍煩請查收見覆施行等因到臣該臣查得松潘威茂所屬土司番民於

勅諭未到之前俱相繼繳印投誠臣一一撫賞換給執照訖其發到

勅諭自應另疏齎繳而副將譚天敘臣令齎捧勅諭由重慶一路招撫譚弘復遣投誠總兵牟漢鼎

協同前去俟有就撫情形或就近赴將軍臣吳丹王進寶處具

題或仍赴成都徵臣具題總諭二弁取便蚤爲復

旨外所有起發過緣由相應報明至郭壯圖胡國柱夏國相吳應期馬寶我

皇上旣沛寬仁特降專

勅許其開導吳世璠投誠臣准陝西督臣哈占送到刊刷謄黃臣復一一致字交接誠副將張鳳翔

差家人張得成王友齋執前去貴州招撫於二月初十日起行訖再查張鳳翊與郭壯圖爲姑表弟兄曾任黎雅僞遊擊已經辭職現住成都合併敘明伏乞

皇上睿鑒施行康熙十九年三月初八日奉

旨覽卿奏松潘威茂所屬番民相繼投誠知道了該部知道

題報恢川清出賊遺糧餉疏

題爲已克之蜀省秋毫無動遠道之秦民輓運爲艱官兵行糧料草急宜措備謹敘明撫司冊報仰祈

睿鑒勅議事臣查成都乃四川省會錢糧賦稅總彙之所且欽奉

上諭以後所至地方必先清查遺糧爲急務臣入城之日首以倉庫錢糧爲重卽令僞巡撫張文德仍暫行巡撫事僞按察司董定國暫署布政司

事清查造冊開報并嚴禁官兵於城上列隊安
民三日後方許下城下城之日嚴禁搶掠卽民
間鷄犬不許驚擾而市肆照常總皆仰遵

功令救民於水火之中惟是官兵日用行糧料草理
當急爲供辦今據撫司報稱我

朝舊制四川一省每年額徵丁糧條銀學租銀鹽茶
稅課魚油井磨雜課并石碓西陽土司糧銀等
項共合銀六萬五千九百兩零本色京斗米九
千四百三十五石零其外兵餉全賴協濟銀兩

於外省至逆賊蹂躪以來節年加派雖多俱係
僞將軍王屏藩僞總督王公良僞將軍韓大福
經理有差官徑收徑解者有差官徑赴各處提
解者有布政司轉解者年終總報撫院銷算布
政司各有交代冊可考僞布政魏峻於大兵未
到之前逃走庫內存貯止有僞錢五百四十二
串絹三疋珊瑚素珠一盤僞廢銅印一十二顆
其庫內銀二千三百四十九兩係僞將軍韓天
福臨走拏去止有按察司衙門存庫罪贖銀

百九十八兩并倉內現貯京斗米二千零一石六斗合放兵樣斗實一千三百九十九石一十所有十九年應徵各項錢糧尚在各州縣催徵未經入庫等情冊報前來臣以錢糧事關重大省會地方何止此數所報是否實情難以遽信令其將已徵未徵在官在民各數目分別欸項造冊咨送戶部查考仍俟新任撫臣布政到日通行查報又據前遣招撫遊擊馬登仕守備葉自昌報稱雅州名山榮經蘆山各僞州縣官常

念茲周維新羅安張學堯等繳印投誠共報收貯錢糧銀一千三百五十七兩礮紫所收稅僞遊擊劉定國王國泰等公報收存稅銀二百一十五兩二項共銀一千五百七十二兩等情又并研僞知縣洪灝稟首未起解米折銀一百七十兩仁壽縣僞知縣涂應詔稟首未起解舊派餉銀三十兩新派餉銀二千八百八十九兩除前後批解五百三十兩外尚餘有陸續徵收過零銀因冊籍在縣未查的數連銀并冊俱交經

承收執請示交代等情臣俱批行布政司查核
明白收庫分晰造冊報部作正開銷至川民雖
云被賊蹂躪六載橫徵暴斂苦不堪言然臣一
路官兵所到地方秋毫無犯農耕於野商安於
市廬舍田疇一無侵擾如此其供辦徵臣所統
一路入川官兵行糧或亦不難况平慶臨鞏四
府之民自用兵以來輓運無休可謂苦極且途
長路險又不通舟楫再難令其遠爲跋涉臣已
行令署布政司事僞按察司董定國署糧道事

同知傅作楫將十九年應納糧米遵照我

朝舊制於各州縣催徵急供軍需不足者俟協餉到
日卽爲招買所有協餉銀兩臣移會督臣哈占
急爲接濟至官兵十日之內克取成都倍道兼
程無分晝夜馬匹率皆瘦損不堪必須急急加
料喂養但蜀省向無應徵豆草經制馬匹俱支
乾銀欲行招買又無應動銀兩臣只得亦行布
政糧道二官於附近州縣善諭百姓催收料豆
接濟急需俟協餉到日補發招買銀兩而各民

感激無擾之恩勉力樂輸接濟目前自難久繼
必俟協餉銀兩星馳解運前來庶可有濟緣係
題報川省錢糧并請速發協濟銀兩供辦緊急軍
需事理貼黃難盡伏乞

皇上睿鑒全覽

勅下速議施行

招撫建昌敘州馬湖文武疏

密題爲恭報微臣遣發官兵招撫到建昌敘府馬
湖文武官員并逆孽僞勅僞諭情形仰祈

睿鑒勅議蚤奏蕩平事竊臣恢復成都之後兩次遣
發官兵於建昌敘府等處相機勦撫并敘府文
武差人通款緣由業經

題報在案茲於二月十四日據臣標左營遊擊龔
玉柱投誠遊擊楊嘉珍等塘報蒙差卑職等統
兵招撫敘府等處除李總兵郭道官遵令前赴

成都投見已經具報訖二月初七日有投誠鄒
總兵下把總王得勝從重慶前來卑職查問重
慶情形據稱重慶十五日聞得成都失了大家
都慌亂起來督標楊總兵逃奔貴州姜總兵李
錢二副將出城不知何往民俱逃散城已空了
知府文官俱來敘府投誠夔府巫山於正月二
十七日差僞官僞兵前來重慶報捷見重慶慌
亂來人將旗插在河對面仍奔逃回去把總係
正月二十九日自重慶起身前來等語轉報到

臣又據該遊擊等同敘府投誠總兵鄒九疇蔣
榮德副將蕭琛等報稱卑職等前差人往永寧
暗通書信於本月初七日未時分途遇有僞總
兵高元烈差僞千總張富廣不敢前來轉差僞
兵一名楊二執文二角係與敘馬營蕭將官之
文卑職等公同拆視逆賊有三路進兵之語卑
職等一面遣發官兵偵探外今將原文二件一
併呈驗等語又僞總兵李芳述僞川南道郭友
龍前來成都見臣繳驗到逆孽吳世璠僞諭一

道內係諭令總兵李芳述等官兵前去保寧會合緣由并僞虎牙將軍韓天福僞布政魏峻與該道郭友龍照會咨文二件內係要脅敘城文武聚兵意圖復舉等語再該鎮道口稟在先止知大兵俱由保寧一路原不期青川一路官兵來得如此迅速一聞成都失了人心慌懼戰不敢戰守不能守卽重慶之賊聞風亦皆膽寒又李芳述復稟彼聞得成都之信卽兩次差人暗去撤調原留守巫山之兵若彼兵一退各家兵

俱不能守湖廣大兵一進可以取得夔府各等情到臣臣卽厚賞并宣布

皇仁令其候

旨從優敘錄外該臣看得四川一省有重山之險有大江之阻實爲滇黔倚恃重地連年逆賊敢於抗衡無恐者賴有此也今成都腹心旣失處處已在瓦解當此人心震動之際各路官兵理宜急急攻進如潮廣廣西官兵此時有無進取以及兵抵何處相去寫遠臣不能知而重慶如此

慌亂城竟騰空至正月二十九日保寧大兵尚無消息更不知有何阻隔竊憶逆孽僞諭一云督兵前赴保寧一云婚期尚遠業停返滇之議以及全粵歸正三路發兵之語雖詞涉狂悖然揆情度勢不過勉強聲言借此以安人心如我兵各路爭先而進正逆賊亡魂喪膽之時戰旣不能守亦無措今建昌鎮道差遊擊吳化龍同臣原遣招撫遊擊治國用已將印劄繳到成都而馬湖文武亦皆相繼接到是川南已定矣其

夔府遵義重慶理宜急取而湖南廣西均應努力進攻蚤奏蕩平倘稍遲迴大失機宜在諸臣誰無効力之心豈臣所可遙度惟是南方烟瘴之地江河甚多若過此時天氣炎熱陰雨連綿用兵甚難至敘府文武不奉僞諭僞行拒賊獻城來歸可謂真心向化與尋常投誠者不同臣叩懇我

皇上下沛寬仁仍照總兵王進才事例俱准給以原官以開滇黔招徠之門除繳到僞勅諭僞牌票

另文送部其應否

進呈自聽部臣酌行相應具

題伏乞

皇上睿鑒勅議速覆施行康熙十九年三月初六日

奉

旨覽卿奏招撫到建昌敘州馬湖文武官校誠川南

底定可嘉知道了餘著議政王貝勒大臣會議具

奏該部知道

奏疏存彙卷之二終